

LEKOLLOZIS

p. 2 & 16

NOMINATION DEPUTY PRIME MINISTER

**KAN DEMOKRASI RANN
POSIB SEKI INPOSIB**

p. 3 - 4

ERADIKASION BANN LAKAZ KOT ENA LAMIANT

**ANFIN ENN DEMARS
KI POU AMENN SOLISION?**

p. 5 - 6

**RÉPARATIONS DU CRIME DE L'ESCLAVAGE
À L'AGENDA DES DISCUSSIONS AUX NATIONS UNIES**

p. 12 - 13

**Transparans
dan rekritman...
Reform ou 'status quo'?**

p. 14

**KOTE SESEL
Lavey 50 an
Lindepandans -
Kot nou ete?**

p. 15

**GREEN REPARATIONS FOUNDATION
SERVI MBC ENN 'MISE EN DEMEURE'
POU SO ZOURNAL AN KREOL**

LEKTIR LAPRES

Sorti Françafrique
pou ariv

Africa Forward Summit

Some ki Lafrans finn fer ar bann pei afrikin frankofonn finn komanse dan Paris dan bann lane '70 sou prezidans Georges Pompidou. *Les Français.press* finn publiye le 4 Me 2026 lartik: **Africa Forward 2026 : Le nouveau visage des partenariats Afrique-France s'écrit à Nairobi**. Ladan dir ki sa Some-la ti kouma enn lespas dialog direk ant *L'Élysée* ek bann ansien koloni eropein. Dapre komanter *Le Djely* 11 Me 2026, **Macron et l'Afrique : la fin de la posture, le début de l'apprentissage**, Fransafrik inn mor e lespas vid ki sa finn lese, pe profit Larisi ek Lasinn.

Lartik *allAfrica* 12 Me 2026 dan **Afrique : Sommet Africa Forward à Nairobi : Une deuxième journée plus politique**, finn soulign labsans Mali, Burkina Faso ek Niger dan sa Some-la pou explike kifer Lafrans nepi limit li ar bann pei frankofonn.

Moris kom model sosio – ekonomik dan Losean Indien !

Pou komanse, journal an-lign *Boursorama*, le 20 Novam 2025, ti'nn rebran vizit ki Emmanuel Macron ti antrebran dan Moris dan so lartik **L'île Maurice, une success story dans l'Océan Indien**. Lartik-la finn rapel ki se Moris ki Prezidan Makron finn vizit an premie dan sa parti Lafrik-la pou prepar some G7 an 2026. Me, Prezidan franse inn vinn osi valid model sosio-ekonomik morisien ki baze lor travay bann Franko-Morisien, pou export li an Afrik.

Deziem, *Outremers 360* an dat 15 Me 2026, finn rebran enn lartik *Business Forum* publiye le 11 Me 2026 titre **Opportunités Croisées entre la France de l'Océan Indien et l'Afrique**. Li lor enn fomm pilote par *Business France* e li evok partisipasion Group IBL (Group Arnaud Lagesse, patron aktiel *Business Mauritius*) avek Larenion ek Mayot, pou montre ki Moris finn trouv li kwinse parmi bann DOM-TOM franse alor ki li enn leta souveren. Pe servi li plis kouma enn pies dan dispozitif rezional franse.

Capmod.com le 17 Me 2026 dir dan **Mauritius strengthens its economic presence in Nairobi**, ki Moris inn vinn avek so sekter prive pou develop servis finansie ek zwe enn rol inportan dan lekonomi ek stratezi rezional.

Me kan *Nofi* le 20 Me 2026 met an-lign so lartik **Politique – Pourquoi parle t-on moins (voir pas du tout) de la traite orientale ?** kot li fer referans ar latret negriyer dan losean Indien, sa fer reflesi...

Koler Jean-Luc Melançon

Le 19 Me 2026, Jean Luc Melançon, dirizan La France Insoumise e kandida pou eleksion prezidansiel an Fransan 2027, inn demontre lor rezo sosio ki Emmanuel Macron inn rat enn gran lokazion dan Some Nairobi kan li pa'nn koz lor domenn lasante. Li al ziska dir ki Mayot konserne par nouvo vag lepidemi Ebola ki fek eklate dan Repiblik Demokratik Kongo. Li'nn in-

vit Lafrans diriz enn koalision international pou fer lasante global vinn enn *'cause commune car, faire face à ces maladies écologiques est un défi pour l'Humanité...'*

Artis Tiken Jah Fakoly, artis Ivoirien, ti'nn kouma dir rann so verdik kan li sant *'...la politique France-Afrique-c'est du blaguer tuer, la politique d'Amérique-Africa-, c'est du blaguer tuer...'*.

Warren Malépa

Foto: [Blood:Water Joins Catalyst 2030's Africa Forward Initiative](#) | [Blood:Water](#)

KOMITE REDAKSION

- Sylvio Legallant
- Warren Malépa
- Didier Michel
- Sylvio Michel
- Daniella Police-Michel

KORESPONDAN

- Penda Choppy (Sesel)

FOTOGRAF

- Sylvio Legallant

AKSESIB LOR SIT GRF

<https://greenreparationsfondation.org/>

PROPRIETER EK INPRIMER

Copyright : Green Reparations Foundation

LADRES

73, Lari Hajee Allaman, Plaisance, Rose Hill

TELEFONN 4674737

IMEL lekolozis.journal@gmail.com



KAN DEMOKRASI RANN POSIB SEKI INPOSIB

Pou rezoud kas-tet ki nominasyon enn Deputy Prime Minister ti pe poze, Premie Minis finn finalman swazir pou nom Onorab Ariane Navarre-Marie, Minis Gender Equality ek Bienet bann fami. An efe, selon kriter demokratik reprezantativite, se sa minis-la ki pli reprezantatif bann minorite an politik parmi bann ki ti siseptib kapav okip sa post-la : antan ki fam e manb «Popilasyon zeneral» selon denominasyon Konsititision, li reprezant bien plis ki 50% popilasyon. Li reprezant osi parti MMM ki par so alians avek PTr finn permet l'Alliance du Changement ranport dernie eleksion zeneral; anfin par so lorizinn sagosien, li reprezant lespwar enn pep ki lontan pe atann ki so drwa respekte.

Enn fam ki ena kapasite ranforsi so konpetans

Li kler ki lor plan politik, Premie Minis ek so gouvènanma finn mark enn gran kou dan sa ka-la, kan zot finn aplik kriter demokrasi. Sa kriter-la donn nominasyon Onorab Navarre-Marie tou so pertinans. Depi komie letan pe met an plas bann politik pou resi ranforsi kapasite bann fam e lezot group sosial defavorize! Nominasyon sa minis-la kom Deputy Prime Minister fer parti sa politik-la. Eski pou remet an dout kapasite sa madam-la ranforsi bann konpetans li finn gegne pandan 41 an lavi politik ek plizir lane lexpéryans dan minister fam?

Fodre rekonet ki se sa lexpéryans-la e lankourazman so lekip insi ki lezot dimounn ki deryer li, ki finn donn li kouraz aksepte. Li pa fasil san lexpéryans ek soutien bokou dimounn pou aksepte enn pos responsabilite dan enn domenn kompleks ek tret kouma domenn politik, sirtou pou enn fam e enn fam kreol (dan sans afro-desandan kouma itiliz sa term-la dan Moris). Dayer, nou bizin fer remarke ki bann media ek diskour ofisiel finn soulign lexpéryans profesional Deputy Prime Minister, insi ki so lorizinn sagosien dan enn fami travayer, san evok so lidantite kreol ki finn pas totalman sou silans. Pourtan sa lidantite-la ena so rol dan so nominasyon...

Me nou bizin rekonet ki pandan so 41 an lavi politik, Deputy Prime Minister Ariane Navarre-Marie, fidel ar lideoloji morisianis so parti, pa finn zame pran laparol pou denons enn fason eksplisit sitiasyon inzistis sosial ki bann Kreol finn erite depi lepok lesklavaz. Pourtan li ti fer so premie pa an politik antan ki manb OF (Organisation Fraternelle) e li ti Sekreter sa ONG-la kan li finn poz kandida e finn elu sou banier MMM. Me avek kasir ki finn arive an 1983, li finn res avek MMM alor ki Sylvio Michel finn al avek MSM. Bann Verts Fraternel pa

pou donk atann li lor dosie reparasyon.

Par kont, si Minis Gender Equality ek Bienet bann fami kontinie res koeran ar prinsip demokratik ki finn fer li swazir res dan Parlman e permet li vinn DPM, li ena tou sans fer bann fam avanse. Pa zis bann fam, me osi lezot dimounn ki diskrimine par sistem ki an plas. Pratik demokratik, li lafors sirtou bann dimounn e pei ki an pozision feb lor plan sosial ek politik, sirtou kan aplik li selon bann valer fondamental kouma non-violans ek respe drwa imin dan bann lobzektif presi. Nou konfian ki Deputy Prime Minister ena kapasite pou vinn enn interlokitris serye Premie Minis pou promouvwar demokrasi dan nou pei...

Pou bann intelektual ki finn poz kestion lor so konpetans dan domenn finans ek ekonomik, nou poz zot lakestion : eski Premie Minis enn spesialis dan sa bann domenn-la? Eski pa mem lekip ki asiste PM dan sa bann domenn-la, ki sipoze asiste DPM an labsans PM?

Kote lopoziyon, ki pe arive?

Ziska ler, tou dimounn inn kapav konstata ki Onorab Joe Lesjongard finn res Lider Lopoziyon.

Lemwa dernie, Onorab Paul Bérenger ti'nn vinn devan lapres pou anonse ki so nouvo parti, Front Militan Progresis (FMP), finn soumet Prezidan Larepublik nom Onorab Chetan Baboolall pou ki li vinn Leader Lopoziyon. Selon prinsip Parlman, se parti mazoriter dan Lopoziyon ki asir leadership. E kouma 3 manb ki ti ena dan Lopoziyon depi dernie eleksion zeneral, pa ti reprezant 1 mem parti ou lalians, nouvo parti FMP finn vinn parti mazoriter dan Lopoziyon.

Me ala seki nou finn aprann par laswit: Onorab Adrien Duval ek Franco Quirin, ki ti separe ar Joe Lesjongard, finn deside pou soutenir li pou li res Lider Lopoziyon.

Li drol ki pa finn ena konstestasyon avek sa laranzman-la, sirtou de lapar FMP, ki pe al ziska zistifie sa sitiasyon par lavwa Onorab Joanna Bérenger lor bann radio ki finn invit li.

Sa paret plis kouma bann laranzman stratezik ki demokratik, sirtou avek demars Franco Quirin ki ti pare pou rezwenn lekip gouvènanman lor invasyon bann reprezantan MMM, si zot ti aksepte donn li Minister Spor ki li ti pe rode...

Eradikasion bann lakaz kot ena lamiant

Anfin enn demars ki pou amenn solision!

Extre Diskour Sylvio Legallant, 12 Avril 2026, Choisy

Bonjour ! Kan nou pe koz lamiant, nou pe koz ousi Kanser pou sa bann malere zabitan ki res dan sa bann lakaz Site EDC ki finn konstrwir dan lane 1961/1962 pou termine an 1963 apre siklonn Alix ek Karol ki ti 'nn devaste Moris. Pou reloz bann abitan ki finn retouv zot san lakaz, gouvèrnman finn konstrwir bann site ex-CHA inpe partou dan pei. Malerezman finn swazir bann later brit e finn gegn zot dan 59 landrwa.

An 1991, kan finn vann bann lakaz site-la pou Rs. 500, lor presion Verts Fraternel, bann lakaz EDC ti 'nn fini koumans deteryore e ti pe bizin met prelar lor zot twa pou kapav dormi. Zot bann abitan pa ti ena lot swa ki aksepte aste lakaz.

An 2000, lor enn lakor politik dan lalians MMM-MSM, Verts Fraternel (VF) ti demande ki vann osi bann later site pou ki bann proprieter lakaz kapav gegn zot kontra ek pran 'loan' pou fer nouvo konstrksion an beton. Joe Lejongard ki ti Minis Lozman sa lepok-la finn refize. An 2006, ankò lor presion VF, nouvo gouvèrnman desid pou vann later lor enn pri derizwar : Rs. 2,000. Me lor 59 plas kot ena Site CHA, ankò ena 5 plas kot pa kapav vann later. Se bann site Riambel, Tamarin, Briquetterie, Ste Claire Good Lands, ek EDC Grand Gaube pou bann rezon ki res inkoni ziska zordi. Finn donn kom rezon ki zot lor 'pas géométrique'... Rezilta, ena bann zabitan ki pe dwa bay ziska pre Rs.200.000 pou enn later ki finn vande pou selman Rs. 2,000 pou 54 lezot site...

Finn ena bokou abitan sa bann lakaz site EDC-la ki finn desede alaswit enn kanser. Kan lakaz-la ti fek konstrwir zot bann pano an lamiant ti ankò bon, me avek letan, zot pe desintegre e vinn enn menas serye pou lasante. Pourtan TJC dan so rapor an 2011 finn fer bann rekomandasion (dan Vol 1 paz 419 No 12 'For our Cite') kot li dir ki bizin 'pull down such houses on a phase by phase basis and new apartment should be allocated to such residents'. Sylvio Legallant finn souligne 'ki pou Lopital Victoria Candos finn anlev tou bann twa an lamiant e finn konstrwir nouvo batiman an beton. Ti pe ousi menas pou detrwir batiman Emmanuel Anquetil akòz li finn konstrwir avek lamiant...

*Depi Lindepandans Moris, komie Gouvèrnman finn vini. Personn pankor kapav eliminn sa bann lakaz-la... Dan Bidze 2023/24 dan paz 78 item 149, Minis Finans ti vinn dir ki zot pou eliminn lamiant partou kot ena e ti pou met Rs. 40 M pou proze **Dezamiantaz ek Reabilasion** sa bann lakaz Ex CHA la. Zot finn gegn letan tom dan karo kann. Le 4 Oktob 2025, MBC ti pas enn linformasion lor lakaz an amiant kot finn montre bann kondision deplorab ek inimin kot fami ankò pe viv dan zot lakaz lamiant. Lerla ti anonse ki Gouvèrnman ti pou met enn komite dan Minister lanvironman pou tret sa problem-la...*

Dan zot renion konsertasion le 7 Avril, bann Fraternel finn donn Sylvio Legallant responsabilite prepar so diskour pou le 12 Avril, lor bann lakaz an lamiant ek problem bann site kot later pankor vande. Ala ki mem semenn anonse ki Kabine minis Vandredi 10 finn met dibout enn Komite Inter-Ministeryel lor sa size-la. So lobzektif: 'examinn tou bann kestion ki konsern bann lakaz Ex-CHA/EDC kot ena lamiant. Manda komite-la, se pou determine dan ki mezir e ki manier pou kapav eliminn faz par faz lamiant dan bann Rezidans Ex-CHA, etan done ki pou sa, enn 'policy decision' ki implik plizir sekter, nesese' [1].

Dan diskour ki Sylvio Legallant finn fer le 12 Avril 2026, alokasion 58^e Fet Fraternel ki finn reini plizir milie dimounn Mon Choisy, li finn koumans par souligne ki problem bann lakaz kot ena lamiant li, dabor enn problem lasante avan ki li abord lezot laspe (lir extre so diskour an ankadre).

Le 21 Avril, Minis Lozman ek Later, Shakeel Mohamed, finn ena pou reponn kestion parmanter poze par depite Annabelle Savabaddy pou kone si 'Komite Inter-Ministeryel ki finn met dibout pou examinn tou bann kestion lie a bann lakaz Ex-CHA/EDC kot ena lamiant, finn koumans bann renion e ki so plan travay.' [2]

Minis Lozman ek Later finn reponn ki li ti pe atann konfirmasion desizyon ki Kabine finn pran. Me li finn gegn linformasion ki avan lafin Me 2026, Statistics Mauritius pou soumet rezilta preliminar lanket ki li pe amene dan lobzektif konn ant-otr kantite lakaz Ex-CHA kot ena lamiant. Ena neseseite aktializ bann dernie done ki dat depi Novam 2022, e komplet zot avan al de lavan.

Depite lopoizion Joanna Bérenger finn oule kone 'si nouvo Komite Inter-Ministeryel pou pran an kont rekomandasion ki dir bizin donn priorite bann abitan ki zot lakaz an amiant pou lakaz NHDC' [...] Minis finn deklare ki 'li pa pre pou pran enn desizyon politik pou donn priorite dimounn ki deza proprieter zot lakaz e donn zot priorite lor bann ki pa proprieter enn lakaz e ki finn atann depi bien bien lontan'.

Lor kestion depite Savabaddy pou kone si pou ena enn sibvansion Leta pou bann abitan, Minis Mohamed finn invit atann rekomandasion Komite-Interministeryel.

Depite Joanna Bérenger finn fer remarke ki 'grant Rs. 130,000 rouni ki pe done pa ditou ase pou rekonstrwir enn lakaz...' Li finn osi demann minis-la si li 'rekonet reponsabilite Leta pou donn enn alternatif sa bann abitan-la... Etan done ki, dan lepase, se bann lakaz toxik ki Leta finn donn zot...'

Minis finn reponn ki apartir bann rapor exper ki li finn lir, li 'anvi avanse avek pridans'. Li finn propoze ki 'analiz rapor bann exper' pou kone seki toxik ou pa toxik e apartir la, atann desizyon Kabine. Li finn dir ki 'li pa pre pou dir ki

gouvernma inn donn dimounn lakaz toxik.

Le 12 Me, Minis Shakeel Mohamed finn revinn avek enn stement dan Parlman apre renion Komite Inter-Ministeryel ki finn fer le 6 Me 2026. [3].

Dan stement-la, li rekonet ki bann lakaz EDC kot ena lamiant, enn problem nasional inportan ek irzan parski lamiant a lori-zinn bann maladi kouma amiantoz, kanser poumon, ek mezotelioma. Li finn osi rapel dokimantasion ki finn fer depi enn kar siek (25 an).

Minis Mohamed finn osi presize ki lobzektif so stement se *'demonstre ki enn prosis finn koumansé' e 'donn enn bilan transparan kot sa finn arive'*.

Li finn met an avan 3 obstak ki finn anpes pran aksion ziska ler: Premie, inkonsistans bann done Leta ki zistifie kifer biro Statistik Moris pe fer enn linvanter pou rekonsilie bann sif. Deziem obstak, se *'lakaz zeritie'*, ki repoz lor bann aranzman konplike. Pou sa, pe rod solision pou simplifie bann prosedir transfer propriyete an konsiltasion avek biro Prokirer Zeneral, e gegn bann mwayin konstitisionel pou kontourn bann demars administratif difisil kan sa absoliman nesese. Trwaziem obstak, se politik lozman aktiel ki diskalifie dimounn ki deza proprieter, pou gegn enn lozma sosial. Pou tir bann abitan lakaz EDC dan piez kot zot retrouv zot, pe mazinn enn esanz volonter Later-kont-Lakaz: Leta rebran so later an esanz enn lakaz kot pena lamiant. Pou abitan ki oule gard zot later, pe konsider 2 opsjon finansie: enn sistem kredi kanalize via Mauritius Housing Company, ou enn sibvansion direk par menaz.

Apre ki li finn souligne dan ki kondision pou rekonstruir bann lakaz e ki li finn asire ki pou kapav retras larzan piblik ki pou depanse pou sov lavi dimounn, Minis finn demann Speaker permission ki li adopte linonsans enn zanfan pou rann kont bann letap ki bizin traverse pou gegn bann *'clearances'* lor plan legal ek finansie avan ki rod aprobasion Kabine Minis pou al de lavan.

Minis Lozma ek Later finn terminn so stement insi : *'Misie Deputy Speaker, Misie, mo krwar dan enn politik transparans. Mo pa pou promet Lasanble seki mo pankor kapav 'deliver', e mo pa pou kasiet Lasanble bann kontrint, bann inkoerans ek bann difikilte. Seki mo kapav asire, se ki enn prosis finn anklanse, ki li striktire, fonde lor bann evidenns, lor lalwa ek disiplinn lor plan fiskal. Par konsekan, mo angaz mwa isi pou tenir Lasanble nasional totalman informe lor sak letap, enn fwa ki finn resevwar rezilta bann test lor landrwa kot ena lamiant dan ler, enn fwa ki finn resevwar bann rapor Statistics Mauritius, enn fwa ki Attorney General finn donn so lopinion, enn fwa ki finn gegn 'clearance' kote finans e ki Kabine finn pran so desizion. Lasante ek dignite sak fami morisien ki viv dan sa bann lakaz-la pa negosiab, e sa lepok kot lapousier finn akimile lor bann rapor inn fini. Mersi'*.

[1] Tradiksjon depi version orizinal dan [Highlights of Cabinet Meeting - Friday 10 APRIL 2026.pdf](#)

[2] Tradiksjon depi version orizinal dan, [Parliamentary Questions - Mauritius National Assembly](#), Sitting Mardi 21 Avril 2026, p. 14].

[3] [Hansard - Mauritius National Assembly](#), Debate 12 Me 2022, p. 90.

Terrains de l'état non vendus dans 5 cités ex-CHA

Lettre ouverte à l'Hon. Shakeel MOHAMED, ministre du Logement et des Terres

Ce 18 mai 2026.

Monsieur le ministre,

Avant d'aborder la raison principale de cette lettre, permettez-moi de vous présenter la Green Reparations Foundation (GRF).

La GRF est une initiative des membres des Verts Fraternelles, créée à la suite de 27 jours de grève de la faim, en octobre 2013 qui pourtant, avait abouti à un accord avec le Bureau du Premier Minis d'alors, mais qui n'a jamais été respecté. Il a fallu cinq ans de démarches pour qu'elle obtienne son enregistrement, en 2018. L'objectif premier de cette fondation à but charitable est de réaliser les réparations économiques aux Mauriciens et Mauriciennes dont les ancêtres ont vécu la traite négrière et l'esclavage et subissent encore les séquelles de ces crimes.

La Fondation se tourne vers vous concernant les habitants des cinq cités ex-CHA/EDC de l'île qui subissent une injustice qui remonte à 2006. C'est cette année-là que furent vendus les terrains sur lesquels les maisons dans les cités ex-CHA/EDC ont été construites. Ils disposent du titre de propriété de leurs maisons, depuis les années 1991 par la vente de toutes les maisons ex-CHA/EDC, mais sans les terrains sur lesquels elles sont situées. Les régions concernées sont St Antoine, Grand Gaube, Riambel, Tamarin et Briquetterie. Ces habitants ne peuvent pas être propriétaires de ces terrains de plein droit, parce que leurs maisons se trouvent soit dans la zone des pas géométriques, soit sur des terrains privés cédés à l'État.

Ce n'est pas la première fois qu'une telle situation a été dénoncée quand Sylvio Legallant l'a évoquée dans son discours du 12 Avril à Choisy. Les habitants de ces cités se heurtent à des obstacles administratifs. Par exemple, le fait de ne pas être titulaires d'un titre de propriété de plein droit, ils ne peuvent pas faire de demandes auprès des autorités concernées pour une subvention pour la construction de dalles de leurs toitures qui fuient de toutes parts.

Dans une perspective de réparations, nous vous demandons de faire le nécessaire pour que l'État rendent ces habitants propriétaires de plein droit des terrains de leurs maisons.

La Fondation salue le travail que vous avez entrepris avec le comité interministériel que vous présidez pour résoudre la situation des personnes qui vivent dans des maisons contenant de l'amiante. Notre fondation a toujours dénoncé l'injustice que subissent les habitants vivant dans ces maisons qui représentent un danger pour la santé de leurs habitants dont un nombre non négligeable est mort de cancer.

Il est regrettable de constater que depuis l'indépendance jusqu'à nos jours, beaucoup de gouvernements se sont succédé sans pour autant mettre un terme à de telles situations.

Confiants que notre requête pour les terrains non vendus sera aussi prise en considération, je vous prie d'agréer, Monsieur le ministre, mes meilleures salutations.

Dr Didier Michel

Secrétaire

LA JUSTICE AU BOUT DU TUNNEL...

Réparations du crime de l'esclavage à l'agenda des discussions aux Nations Unies

Les réparations économiques du crime de l'esclavage vont connaître un développement majeur cette année-ci car les débats sur les réparations, notamment pour l'esclavage transatlantique, sont propulsés sur le devant de la scène internationale en vue des discussions prévues pour septembre 2026. Une résolution historique votée à l'Assemblée générale appelle à des réparations pour les « torts historiques ». Cette question, couplée aux revendications de l'Union africaine qui a déclaré la décennie 2026-2035, sera au cœur des discussions lors de la rentrée diplomatique.[1]

C'est lors du débat général annuel à l'Assemblée Générale de septembre 2026 (AG 81) à New York que les chefs d'État du monde entier aborderont ces questions de justice historique et d'injustices structurelles mondiales. La résolution historique, portée notamment par le Ghana, qualifie la traite des esclaves de « crime contre l'humanité ». Ce texte pose les bases onusiennes de la demande de réparations. Les lignes de fracture : Le texte fait face à une opposition marquée. Seuls trois pays (États-Unis, Israël et Argentine) ont voté contre lors de son adoption initiale, tandis que de nombreux pays occidentaux se sont abstenus, illustrant la divergence sur la responsabilité historique [2].

La position exceptionnelle de Maurice

Contrairement aux pays qui ont pratiqué l'esclavage, Maurice dispose d'un document officiel qui expose les séquelles de l'esclavage auxquelles doivent faire face les descendants d'esclaves et cela de la manière suivante :

- (i) Les descendants d'esclaves sont mal logés. Une majorité d'entre eux vit dans des lotissements surpeuplés et dépourvus de commodités.
- (ii) L'illettrisme est endémique dans leur milieu ; la scolarisation des enfants doit être repensée pour être efficace ; en raison de leur faible niveau d'instruction et de leurs mauvais résultats scolaires ; les probabilités d'obtenir un emploi dans les services gouvernementaux et parapublics sont minimes ;
- (iii) Ils sont absents de la profession agricole, en raison de circonstances découlant des séquelles de l'esclavage ;
- (iv) Absence marquée dans le domaine du commerce et des échanges, et surtout dans le secteur des petites et moyennes entreprises ;
- (v) La surconcentration de l'emploi dans les travaux manuels pénibles ;
- (vi) Contrairement aux autres communautés, elles ne dis-

posent pas de véritables moyens pour faire entendre leur voix dans les hautes sphères politiques ; la plupart de leurs doléances sont restées vaines ;

(vii) Ils sont mal représentés dans toutes les sphères de la vie publique et dans les institutions gouvernementales. [3]

Les arguments contre les réparations

Les autorités publiques, de leur côté, ne tiennent pas compte des séquelles de l'esclavage. Elles utilisent les arguments suivants pour ne pas donner suite aux demandes de réparations :

L'aspect temporel

L'esclavage remonte à une période trop éloignée dans l'histoire ; cela pose un problème temporel. Les opposants posent cette problématique de la façon suivante : à quelle période dans le temps faut-il remonter pour rendre possibles les réparations économiques ? Cela sous-entend que si l'on peut remonter dans le temps, certaines lois ne peuvent pas rétroagir ? [4]

L'identification des victimes

Les demandes de réparation sont de nature universelle et collective. Ce sont des demandes qui ne concernent pas de cas spécifiques où des violations concrètes peuvent être identifiées. De ce fait, cela rend difficile voire même impossible d'identifier de potentielles « victimes » et les éventuels « coupables ». Comment permettre les réparations alors que leurs ancêtres et les victimes directes vivaient à une autre période ? [5]

La responsabilité du coupable

De même est-il possible qu'un individu soit tenu responsable ou « coupable » d'un dommage commis par son ancêtre dans un passé lointain ? l'héritage comprend aussi les dettes du défunt ; de même le dol peut permettre de remettre en cause un contrat, en droit public l'État peut toujours intervenir notamment pour défendre l'ordre public. Ici, il s'agit de réparer un crime contre l'humanité.

Les réparations sont les solutions à proposer pour un tort causé à autrui. En d'autres mots, les réparations sont une conséquence automatique de la moralité et du droit.

La problématique des réparations du crime de l'esclavage aux descendants d'esclaves n'est plus un nouveau sujet. Elle demeure, cependant, controversée voire taboue car tribunaire des décideurs politiques.

L'exceptionnalité mauricienne des réparations

La République de Maurice est une exception grâce à la lutte politique menée pour des réparations par l'Organisation Fraternelle et les Verts-Fraternels. Des formes de réparations concrètes ont été obtenues : chaque 1er février est décrété jour férié pour commémorer l'abolition de l'esclavage depuis 2001 ; la motion privée de Jean-Claude Armance reconnaît l'esclavage et l'engagisme comme des crimes contre l'humanité ; la montagne du Morne a été déclarée Paysage Culturel en 2009 et la Commission Vérité et Justice mise sur pied en 2009 a rendu son rapport depuis novembre 2011. Cependant, ce sont des formes de réparations culturelles qui ont permis surtout de combattre la politique de son effacement ou sa minimisation dans l'histoire nationale. En effet, quand l'esclavage était traité par les historiens mauriciens, ces derniers censuraient son caractère cruel et deshumanisant. L'argument avancé pour justifier cette présentation de l'esclavage par les historiens était qu'ils ne voulaient pas inciter à la haine raciale pour préserver l'ordre public [6].

Les aides sociales inadéquates pour les réparations du crime de l'esclavage

La deuxième étape est celle des réparations économiques, juridiques et sociales. Elles ne signifient pas donner de l'argent aux individus. Elles ont un objectif plus fondamental : permettre l'émancipation des descendants d'esclaves en leur donnant les moyens nécessaires pour mener une vie décente. Mener une vie décente est une norme internationalement reconnue et encouragée par les différentes instances onusiennes.

Pour être réalisable dans le contexte mauricien, l'État mauricien et les entités privées qui ont bénéficié de ce crime doivent y participer.

Les lacunes des aides sociales à Maurice ont été sévèrement critiquées par le rapport de l'Audit de février 2026. En plus des milliards de roupies gaspillés, l'ardoise est conséquente car environ Rs 4,2 milliards sont allés dans les programmes d'éradication de la pauvreté et d'autonomisation. Il a été indiqué que le système des aides sociales de 2016 à 2024 n'a pas vraiment fonctionné et n'est plus adapté à la réalité mauricienne. En d'autres mots, le plan Marshall contre la pauvreté mis en place en 2016 connaît des lacunes profondes qui méritent d'être adressées et résolues. Le principal responsable est le ministère de la sécurité sociale [7].

L'esquive volontaire des réparations économiques des différents gouvernements de Maurice

Les différents gouvernements qui se sont succédé à Maurice ont eu l'occasion de changer le sort des descendants d'esclaves. Les exemples concrets ne manquent pas. Quand Paul Bérenger était Premier ministre de 2003 à 2005, il a choisi de dépouiller la motion privée de Jean-

Claude Armance de toute sa substance pour miser sur le développement plutôt que d'affronter la problématique des séquelles de l'esclavage.

Après avoir reçu le rapport de la Commission Vérité et Justice en novembre 2011, le Dr Navin Ramgoolam, qui était alors Premier ministre, a préféré confier la tâche à Xavier-Luc Duval, qui était son ministre de l'Intégration Sociale. Ce dernier a préféré mettre sur pied le musée sur l'esclavage au lieu de suivre les recommandations du rapport qui visaient une émancipation économique des descendants d'esclaves.

Feu Sir Anerood Jugnauth et Pravind Kumar Jugnauth qui ont été premiers ministres de 2014 à 2024, ont choisi tout bonnement d'esquiver les réparations économiques.

Tous ces Premiers ministres ont préféré miser sur des programmes de développement au lieu d'attaquer les séquelles de l'esclavage de front.

Ces programmes n'ont apporté aucun résultat concret dans la vie des descendants d'esclaves de Maurice si ce n'est d'encourager la précarité [8].

De 1723 à 2026, les séquelles de l'esclavage sont toujours présentes dans la société mauricienne. Les réparations sont donc toujours d'actualité. Elles sont les seules solutions destinées à régler le problème de l'extrême pauvreté parmi les descendants d'esclaves. La République de Maurice n'a pas réussi en matière sociale comme par exemple pour le logement, l'éducation, les conditions d'emploi dans le secteur informel et le recrutement dans la fonction publique.

Dr Didier Michel

[1] <https://news.un.org/fr/story/2026/05/1158834>.

[2] Ibid.

[3] Truth and Justice Commission, *Report of the Truth and Justice Commission*, Volume 1, Government Printing November 2011, p. 2

[4] G. Ulrich et L. K. Boserup, *Human Rights in Development, Yearbook, 2001*, Kluwer Law International, Nordic Human Rights Publications, 2003, 445 p., p. 7-10.

[5] Ibid.

[6] V., Teelock, *Bitter Sugar, Sugar and Slavery in 19th Century Mauritius*, Mahatma Gandhi Institute Press, Moka, Republic of Mauritius, 1998, v. p. 6.

[7] National Audit Office, *Certificate of Audit and Report of the Director of Audit on the Accounts of the Government for the Financial Year 2024-2025*, February 2026, Government Printing, p. 558.

[8] B., ETAMED, *Crimes et Réparations L'Occident face à son passé colonial*, André Versaille Éditeur 2008, 205 p. V. p. 17.

Konba Fraternel: 1982-2000 (Tom II)

SYLVIO MICHEL

SAPIT 2 - 1983

Gouvernman MMM-PSM kase apre selma 9 mwa!

(Laswit Lekolozis No 65)

Rezolision final lor *Newspaper and Periodicals (Amendment) Act*'.

Li bon rapel ki dan so draf *Newspaper And Periodicals (Amendment) Act 1984*, kosion ti fixe dabor a 500,000 rounpi. Par laswit, dan tex lalwa Parlman ki finn vote le 11 Avril 1984 e proklame par SSR le 16 Avril 1984, som kosion-la ti redwir a 250,000 rounpi. Me le 16 Ziliet 1984, finn vot enn nouvo amandman lor mem seksion tex-lalwa ki finn proklame le 1^e Out 1984. Sa dernie amandman-la finn ranplas kosion par enn interdiksion ou sispansyon lagazet ki pa pey domaz pou difamasyon. Kom kwa 'sit-in' bann zournalis inn finalman enn sikse!

Okenn Konze piblik pou le 1^e Fevriye!

Kan kabine finn examinn enn papie prezante par PM, dat 1^e Fevriye ki mark laniverser ofisiel labolisyon lesklavaz Moris, pa ti lor lalis konze piblik pou lane 1984 [1]. Si mo pa ti prezan sa zour-la, sa lalis-la ti pou pas kouma enn 'lettre à la poste'. Mo finn oblize intervenir, seki finn permet mwa konn pozision bann minis konserne, selma san ki mo resi fer modifie lalis konze piblik la. Mo'nn rapel Premie Minis langazman ki ti pran kan li ti solisit soutien 'Organisation Fraternelle' (OF) apre kasir lalians MMM-PSM an Mars 1983. Se Minis Hervé Duval ki ti reponn mwa plito ki Premie Minis. Li finn pran enn ton poze pou dir ki Moris pa bizin deter bann kadav so listwar. DPM, Sir Gaëtan Duval, finn soutenir li alor ki lezot minis ti'nn res trankil. Kan Premie Minis finn intervenir, li finn afirme ki alokasyon 150e aniverser labolisyon lesklavaz lane swivan, li pou fer ki sa zour-la ena enn konze piblik.

Sa zour-la, mo pa'nn oule kit sa renion Kabine Minis la ar koler. Li ti kler pou mwa ki kestion le Fevriye ti'nn fini diskite ant PM e DPM avan renion Kabine la. Propozision Premie Minis pou enn konze ponktiel an 1984 ti paret zis kouma enn mwayin pou fer mwa reste ou dimwin pou anbet lizie piblik dan ka kot mo ti pou kit gouvernma lor enn kout-tet. Me, sa pa ti posib san mo gegn lakor bann manb OF ki pa ti ankor o-kouran. Antouka, ti fer deziem fwa ki Premie Minis finn les OF tonbe. Premie fwa ti an 1982.

SAPIT 3 - 1984

'L'Organisation Fraternelle' kit lalians

'MSM/Travailliste'

Lamor Lady Kushila Ramgoolam

Dese Lady Kushila Ramgoolam, apre enn long maladi, finn anonse le 5 Zanvie 1984. Madam Gouverner-Zeneral, SSR, ti enn personalite ki ti viv an retre lavi piblik e ti prezan dan laktialite selma alokasyon bann evennman ofisiel inportan. Li finn pas apenn detrwa zour dan rezidans ofisiel nouvo Gouverner-Zeneral; san dout parski li ti ankor tromatize par defet politik SSR, an Zwin 1982.

Apre so kremasyon, pandan lamatine enn rit relizie dan Château Réduit kot mo ti prezan. Mo finn retrouv enn SSR, bien eprouve Château Réduit par sa dernie move kou ki finn ariv li la. Li ti pe asize dan enn fotey, izole dan so silans dan enn landrwa ki ti'nn amenaze dan lakour Réduit pou seremoni relizie ki ti pe deroule dan lamatine.

Anmemtan, ti ena enn mouvman kontiniel bann di-

plomat, minis, fonksioner, bann pros, enn gran nonb sinpatizan travayis ki ti pe ale vini, an silans. Me SSR ti trouv kouraz pou akeyir bann ki ti apros ar li. Zis apre seremoni, mo finn ale pou enn rankont ki ti'nn fixe ar bann azan dan 'Montagne Longue' pou ekout zot doleans.

Deziem evennman ki finn fer laktialite lokal sa zour-la, ti demision depite MMM Régis Finette ki finn larg so parti pou siez an independan, avan ki li pas dan lot kan. So mouv pou kit MMM ti koumanse an Desam 1983, apre ki 3 konseye minisipal mov, (Mira Tapesur, Prem Choonee e S.Panchoo,) finn kit MMM, pou mem 'destinasion' [2].

Le 6 Zanvie 1983, finn aprann enn lot move nouvel: Sir Dayanand Burrenchobay, ki ti touzour an vwayaz dan Lind, inn tom gravman malad e li finn ospitalize Bangalore. Presion politik rezime par slogan 'lev pake ale, ti san dout koz ki finn rann li malad

SSB, eli nouvo lider rouz... Tantativ pou kontrol Ptr tom dan dilo

Pandan ki SSR, ti an retre lavi politik an rezon so dey,, komite ekzekitif PTR finn ena pou reyni an irzans le 10 Zanvie 1984, pou swazir enn nouvo lider. Se SSB (Sir Satcam Boolell) ki finn eli, 'à l'unanimité' kom nouvo lider rouz pou pran flanbo ar SSR. Sa desizion rapid-la ti an efe nesese pou blok tantativ tandem Premie Minis e Onorab Harish Boodhoo, ki ti 'Chief Government Whip', pou plas Onorab Dr. Ghurburrin, zot zom, alatet PTR. Sa ti pou permet zot manipil parti-la a zot lavantaz e anmemtan, dispoz enn mazorite dan Parlman. Dan Kabine, zot ti'nn deza design Onorab Dr Ghurburrin kom 'porte-parole' parlmanter travayis, alor ki Sir Gaëtan Duval ti konsidere kouma sef kominote 'Popilasion zeneral'.

Le 12 Zanvie 1983, tandem Premie Minis – Onorab Harish Boodhoo finn fer enn kont-atak kan, de zot kote, zot finn lans diskision pou kre enn nouvo parti politik ki ti pou sel parti dan gouvernma. Stati sa nouvo parti-la pa ti ankor pare kan finn ena premie reynion ar tou bann partner ki form gouvernma. Premie Minis ek 'Government Chief Whip' finn kanmem explik striktir ek fonksionnman nouvo parti-la. Pou form sa, MSM, PTR, PMSD e OF ti pou bizin 'wind up' kouma PSM ti'nn donn lexanp avan eleksion antisipe.

Li pa ti kler kisannla ti deryer enn tel proze : Premie Minis? Onorab Harish Boodhoo? Zot toulede ansam? Ou bien enn ti pe servi lot? Kouma Premie Minis ti dispoz enn manda 5 an pou diriz pei, li pa ti ena okenn rezon pou 'sabord' MSM, parti mazoriter dan lalians gouvernma ki, pou so baptem elektoral, finn ranport laviktwar lor MMM. De plis, antan ki Premie Minis, li ti deza ena lapwagn pou diriz gouvernma tousel'. Li vre osi ki Onorab Harish Boodhoo antan ki 'Government Chief Whip', ti retrouv li san pouvwar ekzekitif. Eski enn nouvo parti politik ti pou permet li rebondir ou reafirm so lotorite? PM ti deza prevwar tou. Li ti pou plas so bann dimounn dan bann pos-kle nouvo parti-la: dan biro politik, dan komite santral e bann instans rezional. PM limem ti pou lider an plis ki li ti pou okip so fonksion PM. Li ti pou vreman tre pwisan a tel pwin Ki Onorab Harish Boodhoo limem ti pou zwenn tase si li ti 'rod lagratel' (pou rebran enn lexpresion ki PM ti kontan repete anver so bann adverser politik). Finalman ansien lider PSM ti'nn fini kontant li kontign amenn rol Mahatma.

Li kler donk ki lobzektif inavwe sa proze nouvo parti-la ti pe viz PTR. Ti bizin eliminn li definitivman lor lasenn politik lokal. PTR pa ti kapav revandik rol lokomotiv dan kanpagn Out 1983 ki ti donn laviktwar final; SSR limem inn bizin aksepte tretman ki Premie Minis ti inpoz lor li. Lor kestion 'disband', SSB, diplomatikman ti reklam ki li konsilte so lexekitif. Sekreter-zeneral PTR, Vijay Venkatasamy, finn kare-kare dan repons ki li finn done: 'pa kestion disband'. Setinsi ki proze nouvo parti politik finn tom dan dilo.

Fermtir Lanbasad Libien avek expilsion Al Jady

Sa lepok-la ki gouvernma ti'nn pran desizion pou expilse 'manu militari', Al Jaddy reprezantan Libi dan Moris, e ferm lanbasad sa pei-la. Mo ti'nn gagn lokasion avan sa desizion-la, zwenn lanbasader-la 2 fwa omwin kom minis 'Local Government'. Premie fwa ti alokasion inogirasion enn kompleks sportif, Mont Ida. Sa ti'nn konstrwir par 'Cassis Limited, (enn firm 'autogerée' inisie par Jack Bizlall) e ti finanse par lanbasad libien. Sa zour-la, an prezans enn gran lafoul, Al Jady, diplomat san kostim-krat, ti met li ansam ar bann ki ti prezan, kouma ninpor ki Morisien. Sa zour-la, an rezon diferan aktivite ofisiel kot mo ti bizin prezan, mo finn ariv an retar. Tou dimounn ti pe atann mwa, mem

fanfar lapolis. Al Jady e mwa, nou finn esanz detrwa parol. Kouma li ti swete zwenn mwa, mo finn invit li pou vinn minister. Kan li finn vinn minister, ti donk deziem fwa ki mo finn zwenn li dan enn landrwa trankil ansam ar mo PS e lezot kad minister. Sa zour-la, Al Jady ti ankor an 'bush shirt' ki ti tre an vog, sa lepok-la. Diskision finn ariv vit lor enn finansman 12 milion roupi propeze pou bann proze minisipalite Porlwi, an partikilie pou transform 'Square Muammar Gaddafi' dan Plaine Verte. Dan sa lepok-la, Kolonel Qaddafi, anti-inperialist, ti admire kom 'le Guide' pou lakoz Arab, Palestinn, tiermond, parmi bann progresis lokal e an partikilie bann Morisien mizilman.

Dapre prinsip ki existe Moris, tou bann proze lokal ki benefisie finansman etranze, bizin pas par enn komision mix ki met dibout ant pei donater e pei benefisier. Al Jady ti inplakab dan so desizion: pa kestion pas par Komision mix Libi/Moris. Li ti al ziska pretann ki si gouvènmna pa aprouv so fason fer, li kone kouma li kapav asir lantre lamone so lanbasad dan Moris. Letan mo'nn inform li ki proze 'Square Muammar Gaddafi' bizin aprouve par mo minister avan tou, Al Jady inn aret diskision brit brit e finn kit minister.

Par laswit, mo finn prezant enn papie dan Kabine lor bann proze ki 'Bureau of the Socialist People's Libyan Arab Jamahiriya' ti oule finanse. Kabine finn rezet tou bann finansman ki an deor enn protokol. Ti ena osi kritik kont Al Jady lor finansman lezot mikro-proze bann group sible kot gouvènmna pena okenn kontrol.

Bizin dir ki depi lepok ansien gouvènmman SSR, Al Jady ti enn personalite deranzan, ki finn soulev bokou kritik kan li finn partisip ofisielman dan konferans bann parti politik progresis Losean indien dan Antananarivo, Madagascar [3]. Li ti'nn ouver, akote Luna Park, Por Lwi, enn 'Centre Islamique' ki finanse par Biro Libien. Sant-la ti konsidere kom radikal konpare ar 'Al Rabita', enn organism saoudien ki ti pe travay avek bann sosiete mizilmann dapre enn protokol pou zot proze relizie e sosial.

Le 13 Zanvie 1984, enn kominike 'Prime Minister's Office' finn sorti zis pou anons desizion gouvènmna lor Al Jady ek lanbasad Libyen san ki donn zistifikasion:

« The Government has decided to close the Bureau of the Socialist People's Libyan Arab Jamahiriya with immediate effect. All Libyan personnel and their fam-

ilies have been asked to leave Mauritius this evening and have been provided with tickets to that effect. Only one administrative member of the Bureau is being authorised to stay behind for winding up of the Bureau [4] »

Kan Al Jady ti pe kit so 'Bureau', plizir depite lopozi-sion ti prezan. Onorab Paul Bérenger ti ziz « très grave » expilsion Al Jady, e 4 zour apre, li finn kondann fermtir lanbasad libien le 17 Zanvie 1984,.

Minisipalite Porlwi finn prinsipal perdan sa expilsion e fermtir lanbasad-la. Onorab Bashir khodabux, 'lord-maire' a lepok, finn zwenn mwa antan ki minis Administrasion rezional, le 17 Zanvie 1984, pou rod lezot mwayin finansman pou so bann proze.

[1] «Public Holidays(amendment) Act »,20 Desam 1983.

[2] *L'Express* du 7 janvier 1983.

[3] Sylvio Michel, *L'organisation Fraternelle, Noir Sur Blanc*.

[4] *L'Express* du 14 janvier 1983.

(Laswit dan prosin nimero Lekolozis)

Sa lane-la, le 8 Me, Sylvio Michel finn gegn 85 an

Se avek detrwa kamarad pros, ki li finn kouvans selebre sa laniverser-la



AFRICA FORWARD Summit 2026

Enn nouvo version Françafrique...

Premie Some 'France Afrique' dan enn pei ki pa enn ansien koloni franse, finn ouver par Prezidan Emmanuel Macron, le 11 Me 2026, Nairobi, kapital Kenya. Dapre 'BBC News', selma 30 Sef deta ou Sef Gouvernma Afrikin ti prezan alor ki pou 'France 24', ti ena 32 Sef deta ou Sef Gouvernma e ki pou ou MBC-Tv, ti ena 40. Me, kouma okenn sa bann media-la pa'nn kominik nom bann pei prezan, li inposib kone ki sannla pe koz laverite lor nonb exakt bann pei-la. Alor ki li ti absan dan Some 'L'Union Africaine', Premie Minis Moris ti bien prezan parmi Sef deta ou Sef Gouvernma bann pei partisipan. Kouvertir so partisipasion par MBC, finn permet nou aprann ki li finn zwenn plizir personalite kouma Direkter-Zeneral Nasionzini. Lafrans bizin satisfè parski li'nn reysi reynir 30 a 32 lor 54 Sef deta e Sef Gouvernma kontinan afrikin.

Some inn fer dan enn kontex marke par lager rezional inpe partou dan lemond. An efe, sitiasion, dan sertenn rezion lemond bien-bien kritik. Anou sit detrwè ka: lager 4 an dan Likrenn par Larisi pa pre pou fini; lager, depi fin Fevriye 2026, dan Mwayen Orian, deklanse par Etazini ek Israel kont Liran ek Liban, ankor pe dominn laktialite, pa kone kouma sa pou termine; mem a distans, konfli ant Pakistan ek Afghanistan fer bokou mor... Lor kontinan Afrikin, sitiasion pa pli rezwis: apar bann konsekans negatif lor plan ekonomik provoke par sa bann lager rezional la. Ena lager sivil libyen ki remont a 2011 ki zordi ankor paralyz enn pei ki dispoz bann rises enerzetik enorm. Ena osi lager sivil devastater depi Avril 2023 dan Soudan kot bokou dimounn pe perdi lavi e, kot, parey kouma an Libi, bann siper pwisans pe fourni zarm bann group antagonis soudane pou detwir zot prop pei ek zot popilasion. Dan Mali, bann latak rebel FLA (Front Libération de l'Azawad) ek Group Jiadis (Jnim) kot sak groupe ena so prop lobzektif, pe fer ravaz. Bizin osi sit insireksion M23 dan Kongo (Kinshasa), afrontman an Somali ek Letiopi. Lalis-la li deza long.

Lafrans ti kapav reynir plis Sef deta e Sef Gouvernma pou sa Some Nairobi-la, me, limem inn sibir grogro rever dan Mali, Burkina Faso, Niger, Tchad ek Senegal kot larme franse inn oblize lev pake ale apre loperasion Barkhane ki finn dire depi 2017 ziska 2022 pa finn rei-

si kont bann jiadis. Ena osi move relasion ar serten pei Arab ki ti so bann ansien koloni, kouma Lalzeri, an rezon krim ki finn komet pandan peryod kolonal e ki Lafrans pe difisilman rekonet. Deza dan 19e Some Frankofoni ki ti fer an Frans an Oktob 2024, bann responsab franse ti'nn deza konstate ki linflians zot pei dan Lafrik frankofonn inn sibir enn rekil....

Eski 'Africa Forward' mark enn tournan dan politik franse an Afrik?

Li vre ki aktiel Prezidan Franse ki pou terminn so segon ek dernie manda an 2027, finn aret politik 'pré-carré' dan bann ex-koloni afrikin frankofonn. Li finn oule devlop enn nouvo konsepsion dan relasion Lafrans ar tou bann pei kontinan Afriken. Prezidan Macron oule met de kote divizion kree, lor kontinan Afrikin, a lepok kolonial par diferan pwisans eropein kouma Lespagn, Rwayom Ini, Portigal, Lamalmagn, Belzik e bien sir so prop pei. Sa bann kolonizasion-la kouma nou kone, finn al eska itiliz lesklavaz ek latret negriyer. Me selma, Prezidan Macron pa finn al tro lwin ar so 'nouvo' politik ki remont a 2017, lepok so premie manda: enn vizit pou soutenir bann SMEs dan Gine Bisao, enn ex-koloni Portige; enn soutien finansie pou enn fondasion dan Nigeria, ansien koloni britanik. E zordi, ar Some Nairobi Lafrans inn reyni bann pei Afrikin dan enn ex-koloni britanik ki andete e nepli kone ki laport pou tape. Li'nn anons investisman 23 miliar 'Euros' dan bann pei Lafrik.

Bien sir, enn tel som pa les indiferan bann dirizan afrikin ki pe fer fas sakenn, enn fason kronik, kriz ekonomik provoke par move gouvènanans (koripsion, diktatir, politik ekonomik extravagant), inzerans etranze ki'nn met lame lor rises nasional, konfli arme frontalie ou det prekolonial... Bann ki dan linposibilite ranbours det ki finn akimile, zot retrouv zot bizin inpoz losterite zot pep an rezon bann plan ekonomik striktirel inpoze par FMI, La-bank Mondial, lezot institisyon finansie prive, bann pre ar pei ami. Sa som 23 miliar 'Euros' ki Prezidan Macron inn met lor latab pa pou ed Lafrik sorti dan so sitiasion aktiel, me li sertennman pou permet Lafrans an retour tir profi lor sa linvestisman-la.

An 2050, Lafrik pou kont 2.5 miliar abitan!

Bizin rapel ki bann pei Afrikin kont deza depi 2025 enn popilasyon ki plis ki 1.5 miliar abitan ki, an 2050, pou vinn 2.5 miliar, dapre enn prozeksion CEA ki enn komision Nasionzini. Tousala nesesis e pou nesesis grogro investisman nasional e etranze dan lobzektif enn developman dirab bann pei Lafrik e sirtou pou evit bann gro katastrof kouma lafaminn, epidemi, lager, imigrasion klandestin, deplasman bann popilasyon akoz epidemi ek lager.... Li bon rapel skandal ki René Dumont, inzenier agronom franse, e premie ekolozis ki finn poz kandida an 1974, finn provoke kan li finn pibliye so liv intitile *L’Afrique noire est mal partie*, an 1962. Pourtan li pa ti ena tor denons manier ki finn fer dekolonizasyon e bann mwayin ki finn met an plas pou kontign kontrol li. Zordi ankor, an rezon bann rises ki zot dispoze dan zot sousol, bann pei afrikin atir konvwatiz bann ansien pei kolonizasyon, me osi bann siper pwisans kouma Etazini, Lasinn, Zapon, Larisi, Inion Elopein e mem Lind! Zot osi finn ena sakenn so Some dan Lafrik kot sakenn finn osi anons bann som kolosal ki zot kont investi, me ki an realite viz bann resours souterin bann pei afriken la. Zot inpoz enn nouvo form kolonizasyon ekonomik e politik. Serten pei Arab pe rod zot, inpoz zot o-nivo relizye par bann group rebel jiadis arme. Larisi inn ranplas larme franse par group mersener Wagner pa selma dan bann ex-koloni franse me osi dan bann ex-koloni Portige kont rebelion ek jiadism. Zot komet osi bann atosite dan lapopilasyon. Rwayom Ini dispoz ‘Commonwealth’ pou kontinie so dominasyon ekonomik e kiltirel. Etazini sou Donald Trump pa ezite pou ogmant tax lor bann prodwi Afrikin exparte ver marse amerikin. Li finn osi menas AGOA (Africa Growth and Opportunity Act) ki so predeser Bill Clinton ti donn Lafrik sibsaharienn, an 2000, antan ki enn mwayen reparasyon lor lesklavaz ek latret negriyer. Kont aktiel Gouvernma Lafrikdisid, Donald Trump inn pran ‘fait et cause’ pou bann ‘Blan’ ki proprietier later e kont politik expropriasyon Gouvernma Sidafrikin. Li’nn al ziska akeyir plizir milie sa bann dimounn-la dan Etazini. Dan RDC (Congo-Kinshasa), Prezidan Trump inn swadizan regle konfli instige par Rwanda dan Lest sa pei-la : li’nn inpoz bann kondision kot investiser amerikin sorti la gagnan ar rises sousol kongole!

Kot kestion reparasyon pou desandan esklav inn pase?

Some ‘Africa Forward’ pa’nn diskite kestion reparasyon pou desandan esklav ki Prezidan Ghana, John Dramani Mahama, ti prezante lor nom group afrikin e ti fer vote, le 25 Mars 2026, dan Lasanble Zeneral Nasionzini, par 123 pei, kont 3 (Etazini-Israel-Arzantinn). Lafrans parmi 52 pei ki finn abstenir lor mosion Ghana. Prezidan Ghana finn par laswit zwenn Prezidan Franse, dan l’Élysée pou diskite sa kestion reparasyon-la. 47 zour apre vot Nasionzini finn ena premie Some Nairobi; okenn parmi sa 30 ou 32 pei prezan la pa finn oz soulev kestion reparasyon. Mem Moris ki ti reprezante par Dr Navin Ramgoolam inn zwe mor lor sa kestion-la ki Lasanble Zeneral Nasionzini pou diskite ankor an Septam 2026.

Avan vizit ki Prezidan Macron ti pou fer Moris an Me 2025, me ki finn ranwaye akoz dese Pap François, fondasyon bann Fraternel, Green Reparations Foundation (GRF), ti adres Prezidan Franse enn kourye lor kestion reparasyon ekonomik pou bann desandan esklav Morisien. Prezidan Macron ti fer enn repons ekri kot li finn inform GRF ki li’nn refer so let a so Minis Afer Etranzer, Jean-Noël Barrot. Minis-la pa finn zame fer enn repons. Avan vwayaz Prezidan-la an Novam 2025, GRF finn anway li enn segon let kot zot demann li rankontre enn delegasyon GRF pandan so sezour Moris. Sa fwa-la, Prezidan franse pa’nn fer okenn repons o-pwin ki pandan so sezour, GRF finn organiz enn sit-in devan Lotel Gouvernma. Pandan so sezour a Moris, Prezidan-la pann ditou koz lor reparasyon insi ki Gouvernma morisien. Se kan li’nn retourn Paris ki li’nn reponn GRF. Pou GRF, li ti kler lerla ki finn ena enn konsansis ant Lafrans ek Moris pou pa koz ditou lor kestion reparasyon. Pourtan, se samem Gouvernma Morisien ki finn vot ar group Afrikin Nasionzini an faver reparasyon pou desandan esklav. A Nairobi, silans lor kestion reparasyon explike par doub zwe ki group Afrikin amene an zeneral. Latitid Gouvernma Moris dan Nairobi parey. Moris ki bizin deviz pou so bidze 2026-27, finn met dekote kestion reparasyon ki pourtan vital pou sa parti so popilasyon ki merit ki rann li zistis konsernan krim lesklavaz...

Sylvio Michel

Transparans dan rekritman...

Reform ou 'status quo'?

Parmi diferan zistifikasyon ki bann portparol MMM finn avanse pou res dan Laliens Sanzman, zot ti met an avan zot devwar anver bann militan.t ki zot pa oule sakrifie ankor enn fwa par zot demision. Zordi, ki tou inn rant dan lord apre ki zot trwa ansien koleg finn pas dan lopoziyon e enn nouvo parti Fron Militan Progesis (FMP), zot bizin dir ki zot kont fer, konkreman, pou sa bann militan.t-la, ki kouma tou Morisien, bizin ena drwa gegn enn post dan fonksion piblik kor para-etatik ou kolektivite lokal, san baking politik, di moman zot ena lexperyans, konpetans, sertifikasyon mem si zot ankor zenn, pou aksed zot osi dan fonksion piblik.

Program Gouvernman 2024-2029 ki Prezidan inn prezante apre laviktwar 60-0 pa prevwar nanye kom amandman pou PSC, DFSC, LGSC ou pou kree enn lazans rekritman pou bann kor para-piblik. Eski pou ena reform bann institisyon rekritman piblik ek para piblik? Ou bien eski pou gard 'status quo' ki zordi pe protez Morisien ki pa oule sanzman ki pa dan zot linteres?

Koudey lor bann lazans rekritman piblik

Pou rekritman, nomination e promotion dan fonksion piblik (minister/departman) ek lapolis, ena dan Konstitisyon Moris ki finn aprouve depi 1967 dan eleksion zeneral, 2 institisyon ki finn etabli Moris antan ki enn Leta independandan souveran : 'Public Service Commission'(PSC) ek 'Disciplined Forces Service Commission (DFSC). Tou amandman dan sa 2 komision konstitisyonel-la nesessit enn mazorit

3/4; mazorit ki Gouvernman aktiel dispoze dan Lasanble Nasional. Pou ki ena reform, tou pou depann lor enn volonte politik inebnanlab bann depite e minis MMM. Li enn travay difisil ki demann kouraz ek konviksyon si nou kone kimanier rekritman kontrole par sistem ki existe pou fonksion piblik...

Konsernan bann kolektivite lokal, setadir minisipalite e Konsey distrik, ena 'Local Government Service Commission (LGSC) ki ti kree an 1975 [1]. Laliens MSM-PTr-PMSC ti itiliz LGSC pou kontre MMM ki, dan sa lepok-la, ti kontrol 3/5 minisipalite. Sa lalwa-la, an efe, ti 'nn anlev pou vwar rekritman ek zesion personel administratif depi tou bann kolektivite lokal pou remet sa dan lame LGSC ek bann CEOs nome par LGSC limem pou bann kolektivite-la. Kanta Direkter LGSC, li nome par Gouvernman. Lor plan finansie, zordizour, bann kolektivite lokal depann antierman lor finansman Gouvernman santral pou zot fonksione. Depi 1983 ziska 2026, okenn aliens politik ki finn o-pouvwar pa finn tous sa lalwa-la ki anti demokratik e ki paraliz ladministrasyon Gouvernman lokal. Dernie skandal, lisansiman ek nouvo rekritman zis apre eleksion zeneral 2024 an rezon bann rekritman ki finn fer zis avan eleksion-la. Sa demontre a ki pwin LGSC enn fars.

Li osi inportan souligne ki bann 'CEOs', 'Managers' ou bann direkter pou bann institisyon para-etatik (ki inklir bann labank piblik), zot nome par Gouvernman. Par konsekan, pli souvan dan sa bann ka-la, 'backing' politik nesesser. De plis, rekritman bann personel administratif dan sa bann institisyon-la fer osi san pas par PSC. Okenn

laliens politik ki finn o-pouvwar, pa 'nn tous sa dispozisyon rekritman-la dan bann institisyon para-etatik. Seki signifiek ki sime lib pou tou sort kalite diskriminasyon ek proteksion.

Anfin, Moris dispoz bann biro pou lanplwa ki anreziste tou bann Morisien.n ki pe rod enn job, me ki pa vreman servi.

Disfonksionman dan sistem rekritman

Staff List ki enn dokiman piblik inprime par 'Government Printing' konpil tou bann linformasyon lor tou bann dimounn ki PSC ek DFSC rekrite; me li pa aksesib pou tou dimounn. Li pibliy nom ek prenom tou bann fonksioner, pos ki sakenn okipe minister par minister, departman par departman. Enn tel dokiman permet konn konpozisyon personel administratif sak minister, sak departman. Atraver bann nom e prenom bann fonksioner, li fasil idantifie 'caste' ou communauté sakenn. Insi li possib verifie ki bann kominote ki finn plis ou mwins rekrit dan fonksion. Sa *Staff list*-la etabli enn veritab skandal ki ankor la! Li kler ki rekritman dan fonksion piblik fer lor baz bann kriter ki bien defini.

Lexperyans ki mo finn fer antan ki minis dan 3 gouveman diferan, permet mwa isi koz lor bann seki dan sistem pou fonksion piblik e lapolis, permet bann 'abus' pou satisfere politik 'sak zako protez so montagn', enn slogan ki finn vinn popiler an 1983. An 1968, kan bokou fonksioner ek kad siperyer dan Gouvernman kouma dan sekter prive ti swazir demisione pou emigre

an Lostrali an rezon politik laper distiye par PMSD avan eleksion zeneral 1967, Moris inn fer fas ar enn problem difisil dan ladministrasion santral insi ki dan sekter prive. An 1970, mo ti fer parti enn delegasion l'Organisation Fraternelle ki Sir Veerasamy Ringadoo, alor Minis Finans e Premie Minis par interim, ti'nn oule zwenn dan kad preparasion enn lamars fraternel an peryod leta dirzans. Sa lepok-la, li ti'nn dir ki Moris inn travers enn peryod difisil ar demision bann kadr sipe-ryer insi ki bann ti fonksioner dan ladministrasion santral; ki gouv-ernma finn bizin aplik enn lot sistem rekritman pou vit-vit form nouvo kad. Se dan sa fason-la ki fonksion piblik inn ena fonksioner kot mazorite dan enn mem kominote.

An efe, kapav sit 2 lexanp ki sa sistem rekritman-la ki mo'nn osi temwin kan mo ti Minis Lapes an 2000-2004. Premie lexanp, ka minister kouma Lasante ou departman Lapolis kot bizin rekrit plizir santenn dimounn pou donn zot trening pou vinn infirmie.r, polisie.r, etsetera. Enn lalis ti sirkile parmi bann minis pou verifie si zot dimounn inn plase ou pa pou donn zot lokazion plas zot dimounn si zot oule. Enn lot ka, dan mem peryod, an 2000: kan rezilta HSC fini pibliye, Gouv-ernma rekrit plizir milie parmi bann zelev ki pa finn gagn labours, me ki'nn reysi zot lexamen HSC. Answit lalis-la avalize par PSC. Donn zot alor formasion ki bizin, san ki ti fer enn lapel piblik pou kandidatir.

Kanta reform dan PSC, mo finn gegn lokazion realize a ki pwin li finn vinn enn 'chasse-gardée', depi 1968.

Pou eleksion zeneral 2000, antan ki kandida lalians MMM/MSM, dan sirkonskripsion No16, mo ti'nn koumans fer kanpagn pou reform PSC ek DFSC dapre lakor ki ti ena ant MSM ek Verts Fraternels. Ser-

tin azan MSM inn al raport mwa ar SAJ. Alokazion dese Sir Veerasamy Ringadoo, alor ki mo ti'nn vinn kot so fami pou rann li enn dernie omaz, SAJ finn osi vini akonpagne par Paul Bérenger e, pa finn ezite lev lavwa pou interpel mwa enn fason imilian devan tou dimounn lor kanpagn ki mo ti pe amene. Paul Bérenger pa ti o-kouran e SAJ pa finn oule donn li explikasion... Apre eleksion, relation ant Premie Minis ek mwa ti'nn refrwadi. *Mauritius Times* ti'nn pibliye enn lartik kont tou reform PSC dan mem lepok.

Par laswit, kan mo finn vinn Minis Lapes, mo'nn dekouver, san kapav fer nanye, ki PSC finn rekrit 48 dimounn dan enn sel kominote pou seksion Proteksion pou sa minister-la. Pli grav, ti ena parmi ki ti Londres kan finn rekrit zot. Setinsi ki kan finn bizin rekrit 20 nouvo dimounn, mo finn demann ki PSC donn lalis bann kandida. Finn gegn lalis-la e finn kapav konstate ki li ti ena nom bann dimounn mem kominote ki ti'nn inskri zot depi 1970. Lerla minister inn deside, gras a Sekreter Permanan Raj Maudhoo ki ti konn bien rouaz e fonksionman PSC, demann permission pou fer rekritman limem, setadir, fer enn apel kandidatir piblik, selekte bann kandida e answit soumet lalis ki li'nn swazir, PSC. Insi, minister inn reysi rekrit 20 dimounn kot dan sak kominote, ti retenir 5 kandida sof kominote Sino-morisien kot pa ti ena kandida.

Eski Gouv-ernma pou oz fer bann reform ki pourtan neser ?

Apre eleksion le 11 Novam 2024, nouvo Gouv-ernma pa finn tarde pou denons bann rekritman ki lansien Gouv-ernma ti fer dan bann minisipalite ek Konsey distrik, atraver LGSC, zis avan eleksion zeneral. Lerla li finn deside lisansie tou bann

ki ti rekrite e ki finn fini par amenn zafer-la devan lazistis. Seki pa finn abouti eska ler. Nouvo rekritman par nouvo Gouv-ernma inn montre, enn fwa ankor, pas drwa, mank vizibilite ek transparans, a tel pwin ki finn ena interpelasion par enn 'backbencher' dan mazorite gouv-ernmantal ek enn PNQ Lider Lopoizion a Lasanble Nasional, Mardi 12 e 19 Me 2026. Minis Kolektivite Lokal, Onorab Ranjiv Woochit, ki finn ena pou reponn, inn oule kasiet li deryer dispozision LGSC. Me li finn ena ler bliye desizion lisansiman bann dimounn ki ti rekrite zis avan eleksion, an 2024. Premie Minis ki finn ranplas Minis 'Local Government', le 19 Me 2026, finn retrouv li dan lanbara kan li ti pe reponn bann kestion siplemanter kot Onorab Shakeel Mohamed inn mem tant interfere. Ena la enn mank transparans: eski Gouv-ernma presedan inn fer ti ilegal, me seki nouvo Gouv-ernma inn fer, li legal?

Li kler ki Moris trouv li zordi dan enn sitiasion ki nepli posib aksepte konsernan rekritman pou ladministrasion santral, lapolis, kor para-etatik e mem sekter prive ki pe regle so problem mindev par rekritman bann etranze.

Moris inn fer enn parkour istorik remarkab depi lindependans e finn reysi relev defi lindependans avek 'panache'. Bokou bann konpatriyot inn emigre e ankor pe emigre parski dan Moris, pou zot pena, lavenir. Nou ena osi, gras a enn sistem elitis edikatif, bokou bann zenn ki fel lexame e retrouv dan ladrog lor sime. Bizin pa zis sanz sistem rekritman, interdi bann pas drwa, politik ti kopin, me sanz osi sitem ledikasion ki zet lor sime bokou nou bann zenn, an partikilie bann Kreol.

Sylvio Michel

[1] 'KONBA FRATERNEL (1982-2000)' dan *Lekolozis* No 64, Mars 2026

KOTE SESEL

Lavey 50 an Lendepandans - Kot nou ete?



Dr Penda Choppy, Liniversite Sesel

Le 29 Zen, 2026, Sesel pe al selebre son 50enm laniverser Lendepandans, depi ki i ti ganny son souverennete avek Gouvernman Kolonyal Britanik, le 29 Zen, 1976. Dan bann lannen ki ti presed Lendepandans, ti annan bokou spekilasyon lo si lendepandans ti meyer pour nou ouswa si pa ti meyer reste atase avek Gouvernman Angle. Enn parmi bann politisyen ki ti enplike dan sa bann deba ti fer en remark konmkwa Seselwa pa ti kapab fabrik ni menm en baton zalimet, alor ki lendepandans nou ti pe rode? La ki nou pe al anfe selebre sa 50enm laniverser, ti neser petet, fer en pti refleksyon lo kot nou'n arive koman en nasyon.

Sa remark dan bann lannen avan lendepandans konmkwa Seselwa pa kapab prodwir ni menm en baton zalimet i reflekte lo konsern serten group vizavi abilite nou pti zil pour fer okenn prodiksyon ouswa fabrikasyon, ki ti kapab apiy nou souverennete ekonomik. I vre ki avek son limitasyon later produktiv ek resours natirel, Sesel ti pou vwar li difisil pour fer okenn prodiksyon enportan ki ti kapab anmenn ver lotosifizans. Son pli gran resours se son lanvironnman natirel, ki enkli son laverdir ek son lanmer. Anfe, se pour sa rezon ki sa de pli gro pilye lekonomi Sesel, se tourizm, swivi par lapas. Malgre ki ziska prezan, Gouvernman Sesel pa'n zanmen antre dan fabrikasyon zalimet, posibelman aköz okenn gouvernman pa'n vwar sa en priyorite pour Sesel, nou'n annan plizyer lezot lendistri ki pe siport sa 2 pli gro pilye lekonomi, enkli lagrikiltir, bann servis finansyel, teknolozi lenformasyon, eksetera. I menm annan en zón endistriyel lo later konble, ki pe kontinyelman agrandi. Depi 2015, Sesel in ganny deklare en lekonomi avek reveni o, donk, i nepli kapab ganny apele en pei Tyermonn ouswa anvwa devlopman.

Apard en nivo lekonomi ase o, Sesel ozordizour i en nasyon ki annan en pozisyon ase for lo nivo rezyonal. Dan ka byennet bann pti leta zil, i'n zwe en rol avangard dan plizyer domenn, tel ki lenpakt sanzman klima ek ladiplomasi rezyonal. Nou osi annan en paspor tre for ki permet sitwayen Sesel antre dan en gran nonm pei san bezwen viza pandan en peryod letan kourt. Sa in fer ki sitwayennete Seselwa in vin tre dezirab pour plizyer nasyonlite ki napa sa menm lavantaz. Azout tousala avek lefet ki nou annan nou prop

lality aeryen, nou prop tenk petrol, e menm nou prop lini-versite, malgre ki i tre pti, i paret ki Sesel in met odefi sa prezonpsyon ki i pa ti pou zanmen kapab debrouye koman en pei souverennete, aköz son pti latay e son resours natirel e imen tre limite. Lo lavey 50enm laniverser nou lendepandans, nou kapab dir ki 'Nou'n fer li!'

Sepandan, nou pti latay ek nou resours limite i ankor reste en pwen feb vizavi nou abilite pour et endepandan. Koman en pti leta zil, e nou menm ganny klasifye koman en 'micro-state', ziska ki degre ki nou kapab protez nou souverennete? An term zeopolitik, lemonn pe aktyelman montre tou siny bann rivalri ant bann nasyon ek faksyon diferan lideoloji, kot bann pti leta zil i vin bann pyon dan zot gran plan. Par egzanzp, Losean Endyen kot dan bann lannen dekolonizasyon, ti ganny deklare en zón lape, in ozordi vin en target pour bann baz militer ki donn en lavantaz stratezik bann pli gran pei ki son teritwar nasyon i lwen avek sa zón. Bann zil Chagos i en legzanp. Kot i konsern Sesel, i annan en pe letan depi ki i annan bann spekilasyon ek lafreyer konmkwa enn nou bann zil elwanye in ganny targete koman en baz militer pour Lenn, dan kad son rivalri avek Lasin. Anfe, Sesel i zanmi avek tou le de, e i resevwar bokou don avek tou le de. Kestyon i, eski sa i pa met nou dan en pozisyon kot nou pou vwar li difisil pour reziste bann demann ki enpoz lo nou souverennete?

Donk, letan ki nou pe antre dan selebrasyon nou 50enm laniverser lendepandans, malgre ki nou annan bokou pour et fyer, nou osi annan bokou pour reflexion lo la, e bokou pour priy lo la. Enstabilite dan Mwayen Oriyan e dan Lanmer Rouz, i deza pe afekte nou direktman kot i konsern komers ek lenportasyon bann furnitir ki nou bezwen. E annezir ki bann rivalri zeopolitik i eskalade, nou pou vwar li bokou pli difisil pour negosye nou souverennete, aköz pwisans apre tou, i ankor reste avek sa ki gro e sa ki annan larzan. Koman bann sitwayen, nou bezwen vin pli okouran nou vilnerabilite, e apresye sa travay delika ki bann ki dan governans i bezwen fer, pour sofgard nou souverennete. Lendepandans, dan tou son dimansyon, i gou annan, me nou bezwen travay dir e azir avek lasazes pour garde.

Bidze 2026-27

Bizin enn bidze ki introd- wir reparasion pou desan- dan esklav!

An 2025, Gouvernma ki ti fek rant an fonksion ti pran enn desizion makiavelik kan li finn swazir pou organiz eleksion minisipal e asire ranport li avan ki li dir laverite lor lekonomi Moris kan li prezant so premie bidze. Si bidze ti pas avan eleksion, li kler ki li ti pou perdi tou bann minisipalite parski malgre so viktwar minisipal, bidze finn exasper lapopilasyon. Sa lane 2026-la, pou prezantasion bidze 2026-27, sitiason politik nepli parey: so DPM, Onorab Paul Bérenger, Junior minister Onorab Joana Bérenger e 'backbencher' Onorab Chetan Baboolall finn kit Laliens Sanzman pou siez dan Lasanble Nasionale kom manb Lopoziyon dan enn nouvo parti, Front Militan Progresis. Erezman, pa finn ena plis dega: lezot elu MMM pa finn kit pouvwat pou pas dan Lopoziyon kouma ansien lider MMM ti pe oule. Gouvernma dispoze ankore enn mazorite plis ki $\frac{3}{4}$. Lor plan parlemantè, Premie Minis ki osi Minis Finans pena gro sousi pou fer vot so segon bidze 2026-27.

Me sitiason ekonomik Moris zordizour, ankore pli problematik ki lane pase. Dabor, konsernan nivo det piblik ki reprezant 89 % PIB Moris, krwasans inn feb pou plizir rezon: enn kote, pa finn ena gro investisman lokal, prive ou etranze pou bouste krwasans dan nou pei; mem lakor ar Rwayom Ini lor Larsipel Sagos pa finn abouti akoz pozisionman inakseptab Donald Trump: li oule ki kontigne itiliz baz-la san ki li pey enn sou. Enn lot kote, inflasyon inn tap for, malgre mezir pou plis kontrol bann pri lor prodwi inporte akoz lager Etazini-Israel dan Liran ek Liban. Premie Minis inn bouze plizir fwa, swa dan Lind, swa an Frans ek Nairobi pou rod led ekonomik. Sitiason lor soutien ekonomik bann pei ami sa lane-la bien difisil: sakenn ena deza zot prop problem interyer. Kote sekter tourism, pou 2025-26, sitiason ti plis ki korek avek 1.4 milyon touris ki finn vizit nou pei e ki'nn fer Moris ankes plis ki 100 miliard rounpi. Me an rezon ogmantasyon pri biye avion ek difikilte fer rezervasyon pou lane ki pe vini, kantite touris riske diminie... Ki pou arive sa lane-la? Bann konfli rezonal, ki li dan Mwayen Oryan ou dan Likrenn inn vinn anpwazonn tou. Si Moris

bizin satisfè ki li reysi aprovizionn li pou bann prodwi esansiel, an depi bann 'blocus' dan navigasyon provoke par sa bann lager-la mem, Gouvernma pa kapav aplik enn politik osterite dir, dan so nouvo bidze. Pa kapav propoze enn politik osterite ki pou peze lour lor popilasyon san konsiderasyon pou laklas travayer an zeneral ek parti popilasyon ki viv dan enn mizer extrem. Alor ki bann fonksioner pe deza benefisye PRB, bann anplwaye sekter prive pankor kone ki ogmantasyon saleryal zot pou gègne. Reparasyon pou desandan esklav ti bizin figir kom enn item dan sa bidze-la pou sa seksyon lapopilasyon ki viv dan lamizer kronik...

Li ase etranz ki ziskaler pankor ofisielma anonse kan pou ena prezantasyon bidze 2026-27. Anou espere ki li pa koincid ar louvertir 'World Cup'.

S. M.

GREEN REPARATIONS FOUNDATION SERVI MBC ENN 'MISE EN DEMEURE' POU SO JOURNAL AN KREOL MORISIEN

Dapre Konstitisyon Moris, tou bann institisyon piblik bizin respekte bann norm ziridik. Parmi zot, ena bann drwa fondamantal ki trouv dan sapit 2 Konstitisyon. Parmi bann draw-la ena proteksyon kont diskriminasyon. Vedit ki bann institisyon piblik bizin donn enn tretman ekkitab tou bann Morisien.

Nou konsta, seki malgre sa bann norm Konstitisyon-la, pou rekenenans kiltir ek la lang kreol, finn bizin amenn enn batay politik ek ziridik.

Pou selebre 1^e Fevriye 2026, Green Reparations Foundation, ti fer enn sit-in devan biro MBC, Moka, pou demann ki linformasyon an Kreol vinn enn linformasyon nasional e non pa enn rezime linformasyon an Franse. Direkter-Zeneral, Misie Alain Gordon-Gentil, ti zwenn bann dirizan fondasyon kot nou remet li enn let avek nou bann doleans. E li ti dir ki li pou etidie nou demann. Nou ti'nn osi inform Direkter-Zeneral ki si pena okenn progre an rapor avek nou doleans, nou pou amenn enn aksyon legal.

Depi 1^e Fevriye eska Me 2026, MBC pa'nn fer nanye

Le 19 Me 2026, Fondasyon inn met MBC an demer par so Avoue Me N. Appa Jala SA. Nou pou tenir nou bann lekter o-kouran evolision kees-la.